

Katersugaasiveqarneq pillugu Inatsisartut peqqussutaata allannguutissaattut Inatsisartut peqqussutissaanut siunnersuut.

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Peqqussutissatut siunnersuummut nalinginnaasumik nassuiaatit

1. Peqqussutissatut siunnersuummut tunuliaqutaasut

Katersugaasiveqarneq pillugu Inatsisartut peqqussutaat nr. 6, 30. oktober 1998-imeersup allannguuteqartinnissaanut siunnersuut siullerpaamik immap naqqani kulturikkut eriagisassanik nassaanik soorlu umiarsuit umiunikut ilaanik piginnittuuneq passussinerlu pillugit Imaq pillugu inatsisinik atuutsitsineq pillugu isumaqatigiissummi immikkoortoq 149 aamma 303-mut assingusunik aalajangersakkanik imaqarpoq. Immikkoortuni tassani Imaq pillugu inatsisinik atuutsitsineq pillugu isumaqatigiisummik Kalaallit Nunaata naammassinninnissaanut siunnersuut pisariaqarpoq. Naalagaaffiit killeqarfiit oqartussaaffiisa avataanni kulturikkut eriagisassanik immap naqqaniittunik qulakkeerinissaat peqqussutissatut siunnersuutip siunertaata pingaarnersaraa.

Naalagaaffiit Peqatigiit Imaq pillugu inatsisinik atuutsitsineq pillugu isumaqatigiisutaanik atsiornissaq pillugu 5. december 2003-mi UKA03-mi oqaluuserisassat 147-anni Inatsisartut aalajangiinerisa malitsigisaannik siunnersuut pinngorpoq.

Aamma annerusumik teknikkikkut ataasiakkaanik allannguuteqartoqarnissaa siunnersuutigineqarpoq.

2. Peqqussutissatut siunnersuummi immikkoortut pingaarnertit

a) Inatsisit atuuttut

Suliassaqarfik ullumikkut inatsisitigut malittarisassaqaartinneqanngilaq.

b) Siunnersuut

Siunnersuutip immikkoortuata siullia Naalagaaffiit Peqatigiit Imaq pillugu inatsisinik atuutsitsineq pillugu isumaqatigiisutaanni immikkoortut 149 aamma 303 tunngavigalugit suliarineqarpoq. Katersugaasiveqarneq pillugu Inatsisartut

peqqussutaanni § 24a-tut nutaatut siunnersuutigineqartoq oqaasertamigut imarisamigullu danskit katersugaasiveqarneq pillugu inatsisaanni § 28a amerlanerpaatigut assigaa.

Peqqussutissatut siunnersuut naapertorlugu Namminersornerullutik Oqartussat tassaapput immap itisuup naqqani nassaanut oqartussaasut.

Immikkoortoq 149 allatut oqaatigalugu maannakkut pissutsinit allaaneruvoq, taanna naapertorlugu immap itisuup naqqani naassaartup nammineq nassaarisani oqartussaaffigimmagu.

Imaq pillugu inatsisinik atuutsitsineq pillugu isumaqatigiissutip tunngavigilluinnarpaa nunat inatsisitigut oqartussaaffiisa avataanni immap itisuup naqqani kulturikkut eriagisassanik nunat pineqartut isumaginnittusaa nerannut pisussaaffiliineq. Kalaallit Nunaata isumaqatigiissummi allassimasut naapertorlugit taamatut pisussaaffiliinermut malinninnissamut akisussaasuunissamullu pisariaqarpoq nunap inatsisitigut oqartussaaffiata iluani malittarisassat assigalugit malittarisassaliornissaq, taamaalillunilu nassaamut nuna oqartussaalerluni. Kalaallit Nunaanni Nunatta Katersugaasivia pisuni aalajangersimasuni naliliisartussaassaaq.

Immikkoortoq 149-mi pineqarput itsarnitsanik oqaluttuarissaanermullu tunngasut tassanilu oqaatigineqarluni immikkoortumi itsarnitsanik oqaluttuarissaanermullu tunngasut nassaat allangutsaaliorneqassasut imaluunniit nunarsuarmioqatigiit eriagisaattut tunniunneqassasut, naalagaaffik nassaarfiusumut imaluunniit nunamut imaluunnit kulturikkut imaluunniit oqaluttuarisaanikkut imaluunniit itsarnitsanik naalagaaffimmut nassaarfiusumut salliutillugu tunniunneqarnissaa immikkut eqqarsaatigalugu.

Taakku saniatigut takuneqarsinnaavoq Isumaqatigiissut katersugaasiveqarneq pillugu inatsisartut maannakkut peqqussutaannut naleqqiullugu oqariartaatsinik nutaanik atuiffiuvoq, assersuutigalugu oqariartaasoq "naalagaaffik nassaarfiusoq" Isumaqatigiissummi erseqqinnerusumik nassuiarneqarsimangilaq.

Siunnersuummi oqaaseq atorneqarpoq "immap itisuup naqqa" Isumaqatigiissummi oqaaseq "immikkoortoq" atorneqartoq atornagu. Taamatut pisoqarneratigut immikkoortoq 149-mi nassuiaataasumit allaanerunissaa siunniunneqanngilaq.

Immikkoortoq 303-mi pineqarput itsarnitsanik oqaluttuarisaanermullu tunngasut immami nassaat immamilu nassaat itsarnitsanut oqaluttuarisaanermullu tunngasut innarlitsaaliqarnissaannut naalagaaffiit pisussaaffiat pineqarluni. Tamatuma peqatigisaanik aalajangersarneqarpoq tamanna pillugu naalagaaffiit suleqatigiissasut.

Immikkoortoq 303-mi aamma allassimavoq nassaat itsarnitsanut oqaluttuarisaanermullu tunngasut innarlitsaaliqarnissaat pillugit nunat tamalaat akornanni isumaqatigiissutinut allanut naalagaaffiit innuttaannut pisussaaffii pillugit inatsisinut immikkoortoq attuumassuteqanngitsoq.

Immikkoortoq 303, imm. 1-imi, oqaatigineqareersutut, pineqarpoq itsarnitsanik oqaluttuarisaanermullu tunngasut immami nassaat immamilu itisuumi nassaat pillugit inatsisinut immikkoortumi 149-mut ataqatigiisinneqassallutik.

Immikkoortoq 303, imm. 3 naapertorlugu nunami piginnittussaaneq pillugu inatsisinut, kalinnerit imarsiornerlu pillugit inatsisinut immikkoortoq attuinngilaq. Kalaallit Nunaata suli immami itsarnitsanik nassaanik innarlitsaaliinissani imartami oqartussaaffini 3 sūmilip avataanut annertusisimannigilaa.

3. Pisortanut aningaasaqarnikkut allaffissornikkullu sunniutissat

Peqqussutissatut siunnersuut Namminersornerullutik Oqartussanut kommuniullu aningaasaqarnikkut allaffissornikkullu sunniuteqartussaannigilaq.

4. Inuussutissasiortunut aningaasaqarnikkut allaffissornikkullu sunniutissat

Peqqussutissatut siunnersuut inuussutissarsiortunut aningaasaqarnikkut allaffissornikkullu sunniuteqartussaannigilaq.

5. Avatangiisitigut sunniutissat

Peqqussutissatut siunnersuut avatangiisitigut sunniuteqartussaannigilaq.

6. Innuttaasunut allaffissornikkut sunniutissat

Peqqussutissatut siunnersuut innuttaasunut allaffissornikkut sunniuteqarnaviannigilaq.

7. Naalagaaffeqatigiinnermut namminersornermullu tunngasut

Katersugaasiveqarneq pillugu inatsisartut peqqussutaata allannguuteqartinnissaanut siunnersuummut tunngaviuvoq Imaq pillugu inatsisinik atuutsitsineq pillugu isumaqatigiissutip Naalagaaffeqatigiinnit atsiorneqarnissaa. Tamatuma saniatigut siunnersuut namminersulernissamut ineriartortitsinermut naleqqiullugu sunniuteqanninnissaa ilimagineqarpoq.

8. Oqartussat kattuffiillu tusarniaavigineqartut

Peqqussutissatut siunnersuut ukununnga tusarniaassutigineqarpoq:

Nunatta Katersugaasivia

KANUKOKA

Namminersorneq pillugu Pisortaqarfik

Aalisarnermut Piniarnermullu Pisortaqarfik

Aningaasaqarnermut Pisortaqarfik

Katersugaasiviit Kattuffiat; NUKAKA

Kalaallit Nunaata Sinniisua /Adam Worm

Nunanut allanut Pisortaqarfik

Nunanut allanut Ministeriaqarfik /Jurgen Lilje-Jensen

Katersugaasiveqarnermut Ataatsimiititaliaq

Taakkua saniatigut siunnersuut kattuffinnut aalisarnermik ingerlassaqartunut KNAPK-mut aamma APK-mut nassiuqqarpoq.

Peqqussutissatut siunnersuut aallaqqaammut katersugaasiveqarnerq pillugu inatsisartut peqqussutaani § 19-ip allannguuteqartinneqarnissaanut siunnersuummik ilaqaralarpoq, taamaalilluni katersugaasiveqarnermut ataatsimiititaliap ilaasortaasa Naalakkersuisunit toqqarneqartarunnaassallutik. Taamaaliornikkut allaffissornikkut pisariillisaanissaq siunertarineqarpoq.

Taamaattorli Katersugaasiveqarnermut Ataatsimiititaliap, KANUKOKA-p, NUKAKA-p aamma Nunatta Katersugaasiviata siunnersuut pillugu ernumassuteqarnermik ersersippaat. Tusarniaavigineqartut taakkua tamarmik oqaatigaat, ataatsimiititaliaq Naalakkersuisunut attaveqarunnaarpat katersugaasiveqarnermut ataatsimiititaliap inissisimarnganut sunniuteqarumaartoq.

Saqqummiunneqartut tusaatissatut tiguneqarput, taamaalilluni katersugaasiveqarnerq pillugu inatsisartut peqqussutaani § 19-ia maanna taamatut oqaasertaqaannassaaq.

Katersugaasiveqarnermut Ataatsimiititaliami saqqummiunneqartut saniatigut tusarniaanermi allanit pingaaruteqarsinnaasunik ilanngussassaartoqarsimanngilaq.

Aalajangersakkanut ataasiakkaanut oqaaseqaatit

§ 1-imut

Nr. 1-imut.

2003-mi ukiakkut ataatsimiinnermi Inatsisartut aalajangiinerisa malitsigisaannik siunniunneqarpoq Naalagaaffiit Peqatigiit Imaq pillugu inatsisinik atuutsitsineq pillugu isumaqatigiissutaannik 2004-p upernarnerani atsiorniarneqassasoq. Taamanikkut oqaatigineqarpoq atsiornierup kingunerisaanik katersugaasiveqarneq pillugu inatsisartut peqqussutaanni itsarnitsanik oqaluttuarisaanermullu tunngasunik immap naqqani nassaat aamma nunap inatsisitigut oqartussaaffiata avataani nunap ataa pillugit aalajangersakkanik ilanngussisoqassasoq, takuuk Imaq pillugu inatsisinik atuutsitsineq pillugu isumaqatigiissummi immikkoortoq 149.

Tamannalu tunngavigalugu siunnersuutigineqarpoq Imaq pillugu inatsisinik atuutsitsineq pillugu isumaqatigiissummi immikkoortoq 149 aamma 303-p atsiorneqarnissaanut tunngavissat pisariaqartut qulakkeerneqarnissaat siunertaralugu katersugaasiveqarneq pillugu peqqussut allannguuteqassasoq. Nunat ataasiakkaat itsarnitsanik oqaluttuarisaanermullu tunngasunik immap naqqani nassaat innarlitsaalineqarnissaannut, aamma tamanna pillugu nunat suleqatigiinnissaannut Imaq pillugu inatsisinik atuutsitsineq pillugu isumaqatigiissummi piumasqaateqartoqarpoq. Atsiornikkut Kalaallit Nunaat immami kulturikkut itsarnitsanik eriajisassat innarlitsaaliornissaannut minnerpaamik aaqqissuussaqaarnissamut pisussaaffeqalissaaq. Siunnersuummi nr. 1-imi tamakku eqqarsaatigineqarput taamaalillunilu immami kulturikkut itsarnitsanik eriajisassat pillugit kalaallit inatsisitigut aalajangersagaat Imaq pillugu inatsisinik atuutsitsineq pillugu isumaqatigiissummut naapertuutilissallutik. Siunnersuummi pineqarput itsarnitsanut imaluunniit oqaluttuarisaanermut tunngasut immap itisuup naqqani nassaat nalillit Kalaallit Nunaanni aalajangersimasumik najugaqartunit uninngasunilluunniit Danmarkimi innuttaasunit imaluunniit Danmarkimi nalunaarsorneqarsimasutut Kalaallit Nunaanni najugaqartumit umiarsuarnit GR-normulinnit nassaarineqartut pillugit akisussaaffik. Oqaaseq "Kalaallit Nunaanni aalajangersimasumik najugaqartunit uninngasunilluunniit Danmarkimi innuttaasunit" imatut paasineqassaaq Danmarkimi innuttaasut Kalaallit Nunaanni najugaqartutut inuit allattorsimaffianni nalunaarsorsimasut imaluunniit takornariartuunani sivikinnerpaamik qaammammi ataatsimi Kalaallit Nunaanniittut. Nassaat aalajangersakkamut ilaatinneqassappata taamaalilluni Kalaallit Nunaannut arlaatigut attuumassuteqarnissaaq pisariaqassaaq. Danmarkimi innuttaasoq aalajangersakkamut siunnersuutigineqartumut ilaassanngippat Danmarkimi katersugaasiveqarneq pillugu inatsisimmi malittarisassanut ilaasussaassaaq.

Oqaaseq Immap itisoortaatut eqqaaneqartoq imatut paasineqassaaq tassaasoq immap naqqa tamatumalu nunataata ataa naalagaaffiup oqartussaaffiata killeqarfiata avataaniittusoq.

Taamaalilluni pineqarput qangarsuarnitsanit nassaat aamma umiarsuit umiusimasut, umiarsuit usii aamma ukiut untritillit sinnerlugit annaaneqarsimasorisanit umiarsuit umiarnernit sinnikuusut ilanngullugit. Namminersornerullutik Oqartussat inatsisitigut oqartussaaffiisa iluanni immap naqqani nassaat qangarsuarnitsat eqqarsaatigalugit malittarisassat assingi katersugaasiveqarneq pillugu inatsimmi § 24-miipput.

Isumaqatigiissummi oqariartaaseq "qangarsuarnitsanit eqqaassut" atornerqarpoq, kisianni peqqussutissatut siunnersuummi oqaaseq "qangarsuarnitsat" atornerqarpoq maanna peqqussummi oqaatsit atornerqartut allannngortinnagit atuinnaarsaat siunertaralugu. Isumaqatigiissummi malittarisassanut naleqqiullugu imarisaatigut allannnguisoqarnissaa siunertarineqanngilaq. Qangarsuarnitsanut ilaapput inuup najugaqarsimaneranut ineriartorsimaneranullu uppersaataasinnaasut suut tamarmik. Amerlanertigut tassaapput inuit suliarisimasaat atorsimasaalluunniit. Tamanna paasisariaqarpoq pinngortitami pinngortitat aamma oqaatsimut "qangarsuarnitsanut" ilaassasut, taakku inuup najugaqarsimaneranut ineriartorsimaneranullu paasissutissatut uppersaataasinnaappata.

Kalaallit Nunaanni aalajangersimasumik najugaqartunit uninngasunilluunniit Danmarkimi innuttaasunit nasaanik pisortanut nalunaarutiginnissaannut tunniunneqarnissaannullu pisussaaffeqarnerat qulakkeerneqarpoq. Aamma taamaatut atuuppoq umiarsuaq Danmarkimi nalunaarsorneqarsimappat Kalaallit Nunaannili angerlarsimaffeqarluni. Taamaalilluni inatsisit pineqarput taakku malitsigisaannik nunarsuarmioqatigiit soqutigisaattut nassaat innarlitsaalineqassallutik. Isumaqatigiissummi pingaarnertut anguniarneqarpoq malittarisassaliornissaq inuit suliffeqarfiillu namminersortut nassaat pineqartut nammineq atugassamittut pigilernissaannut pitsaaliuisumik taamaalilluni taakku nalillit kinguaatsinnit annaaneqarlutik.

Aalajangersakkami taamaalilluni aalajangiunneqarpoq imm. 1 naapertorlugu nassaat Namminersornerullutik Oqartussanit pigineqassasut, nunat allat suliffeqarfiilluunniit namminersortut piginnittussaanertik uppersarsinnaanngippassuk.

Isumaqatigiissut naapertorlugu nunat arlallit nassaamut piginnittussaanertik piumasarissappassuk nassaaq pillugu qanoq isummertoqassanersoq nunat akornanni isumaqatiginninniarnep inernera apeqqutaassaaq.

Taakku saniatigut peqqussutissatut siunnersuutip qulakkeerniarpa immami itisuumi immami kulturikkut eriagisassat pissusaat Naalakkersuisut akuersiteqqaarnagit allannngutsaaliorneqarnissaat, takuuk § 24a, imm. 4, 1. imm. Inerteqqut kulturikkut eriagisassanut Namminersornerullutik Oqartussanit, Kalaallit Nunaanni aalajangersimasumik najugaqartunit uninngasunilluunniit Danmarkimi innuttaasunit inatsisillu naapertorlugit inunnit Kalaallit Nunaanni najugaqartunit pigineqartunit atuuppoq. Aamma § 24a, imm. 4, 1-imi inerteqquteqarpoq Kalaallit Nunaanni aalajangersimasumik najugaqartunit uninngasunilluunniit Danmarkimi innuttaasunit inatsisillu naapertorlugit inuit Kalaallit Nunaanni najugaqartut, immap naqqani kulturikkut eriagisassanik allanit pigineqartunik pineqartunit akuerineqqaaratik allannnguisussaannngillat imaluunniit allannnguititsiniartussaanatik. Aalajangersakkami siunertarineqarpoq immami itisuumi kulturikkut eriagisassat nunanit allanit imaluunniit inunnit allanit pigineqartut, aamma akuersisoqqaartinnagu allannngortinneqarnissaasa inerteqqutaanerit. Aamma § 24a, imm. 6-imi Naalakkersuisunut inatsisitigut tunngavissaq ilannguneqarpoq, tamatumalu kingorna nalunaarutikkut aalajangersinnaapput, qangarsuarnitsat nassaarineqartut, aamma umiarsuarnit umiarnernit, umiarsuit usii aamma ukiut untritillit inorlugit annaaneqarsimasorisanit umiarsuarnit umiarnernit sinnikuusut ilanngullugit,

inatsimmut ilaatinneqarsinnaasut. Assersuutitut tassani pineqarsinnaapput umiarsuit aalajangersimasut umiarsuilluunniit isikkumikkut aalajangersimasut ukiut untritillit inorlugit pisoqaassusillit, pissutsit immikkuullarissut peqqutigalugit peqqussummut ilaatinneqarusuttut.

§ 24a, imm. 7-mi siunnersuutigineqarpoq Isumaqatigiisummi aalajangersakkat piviusunngortinniarnerninut atasumik nassuiaateqarnissamut apeqqutit paasineqarnissaat siunertaralugu nalunaarusiornikkut malittarisassaliorsinnaanermut Naalackersuisut piginnaatinneqarsinnaanerat. Tamanna aamma naleqqussinnaavoq nassaanut § 24a, imm. 1-imi ilaatinneqartunut, itsarnitsanullu oqaluttuarisaanikkulluunniit erseqqissumik pingaaruteqanngitsunut. Taakku saniatigut assersuutigalugu Naalackersuisut Nunatta Katersugaasivianut qanoq ililluni nalunaaruteqartarnissaq pissanersoq, nalunaaruteqarnissamut piffissaliussat il.il. pillugit malittarisassaliorsinnaapput.

Nr. 2-mut.

Siunnersuutigineqarpoq Nunatta Katersugaasivianut Allagaateqarfianullu nassaanut § 24a, imm. 1, 4 aamma 5-imut ilaatinneqartunut imaluunniit imm. 6 aamma 7 naapertorlugit aalajangersakkanut taamatut nassaat pisariaqartumik isumannaarnissaannut innarlitsaalineqarnissaannullu atasumik aningaasartuutigisimasat akileeqqusisinnaanermut periarfissat pisussaajunnaartinnissaat pillugit aalajangersagaq ilanngunneqarpoq. Erseqqissarneqarpoq § 24a naapertorlugu nassaat § 25, imm. 2-mi pineqanngitsut. Aalajangersagaq ilanngunneqassasoq siunnersuutaavoq nassuiarnissaa qularutigineqaqqunagu. § 25, imm. 2-mi malittarisassat nassaat isumannaarnissaannut paarinissaannullu aningaasartuutit naammaginatut taarserneqarnissaannut tunngasut Kalaallit Nunaata oqartussaaffiisa avataani nassaanut tunnganngillat, tassami isumaqatigiisutip siunertaasa pingaarnerit ilagaat immap naqqani kulturikkut eriagisassat allannguuteqassanngitsut.

Nr. 3-mut.

Siunnersuutigineqarpoq § 24a, imm. 1, 4 aamma 5-imi ilaasunut, imaluunniit imm. 6 aamma 7 naapertorlugit aalajangersakkanut nassaanut akissarsitsisoqarneq ajortoq erseqqissarneqarnissaa siunertaralugu aalajangersagaq ilanngunneqarpoq. Nr. 2-p ataanisulli uani pineqartut tassaapput allannguinerup kingunerisaanik naqqiutit, erseqqissarumallugu § 24a naapertorlugu immap naqqani itisuumi nassaat § 25, imm. 3-mi akissarsititsisinnaaneq pillugu aalajangersakkanut ilaanngimmata. Aalajangersagaq ilanngunneqarpoq assersuutigalugu pisuussutinik pimoorullugu ujarlertoqartalernissaa kaammattorumanagu.

Nr. 4-mut.

Siunnersuutigineqarpoq § 33-mi ilanngunneqassasoq § 24a, imm. 3-5-ip unioqquatinneqarnerani akiliisitsisoqarsinnaanissaanik pisinnaatitsissut.

Nr. 5-imut.

Siunnersuutigineqarpoq § 33, imm. 2-mi ilanngunneqassasoq pineqaatissiisoqarsinnaaneranik aalajangersakkat inatsisit malillugit akisussaasunut atorneqarsinnaassasut.

Nr. 6-imut.

Siunnersuutigineqarpoq § 33, imm. 3-mi peqqussut tungavigalugu malittarisassatigut aalajangersakkanik unioqquutitsisut akiliisinneqarnissaannut inatsisitigut tunngavissaq ilanngunneqassasoq.

§ 2-mut

Siunnersuutigineqarpoq peqqussut 1. junimi atuutilissasoq, taamaalilluni danskit naalagaaffiata Imaq pillugu inatsisinik atuutsitsineq pillugu isumaqatigiissutaata 10. december 1982-imeersup 2004-mi aasap ilaani Naalagaaffeqatigiinnit tamarmiusunit atsiorneqarneraniit atuutilissalluni.

Tamatuma peqatigisaanik erseqqissaatigineqassaaq aalajangersagaq taamaallaat nassaanut inatsisip atuutilernerata kingorna pisunut atuummat.

Ilanngussaq

Naalagaaffiit Peqatigiit Imaq pillugu inatsisinik atuutsitsineq pillugu isumaqatigiissutaanni immikkoortoq 149 aamma 303.

Immikkoortoq 149
Itsarnitsat oqaluttuarisaanermilu pisut

Suulluunniit itsarnitsat oqaluttuarisaanermullu tunngasut immikkoortumiittut, nunarsuarmioqatigiit soqutigisaattut innarlitsaalineqassapput tunniunneqassallutilluunniit, aamma naalagaaffimmut nassaarfiusumut imaluunniit nunamut imaluunnit kulturikkut imaluunniit oqaluttuarisaanikkut imaluunniit

itsarnitsanik naalagaaffimmut nassaarfiusumut salliutillugu tunniunneqarnissaa immikkut eqqarsaatigalugu.

Immikkoortoq 303

Itsarnitsat oqaluttuarisaanermilu pisut immami nassaarinqartut

1. Naalagaaffiit pisussaapput itsarnitsat oqaluttuarisaanermilu pisut immami nassaarinqartut innarlitsaalissallugit, tamannalu pillugu suleqatigiittussaallutik.
2. Taamaattunik niuernerup nakkutigineqarnissaa siunertaralugu immikkoortup 33-p atorneqarneratigut naalagaaffik sinerialik pisussaavoq, immikkoortumi pineqartumi immap naqqaniit tamakkuninnga akuersisoqaqqaartinnagu paaasernerit, immikkoortumi pineqartumi nunap oqartussaaffiup imaluunniit immap oqartussaaffiup iluani inatsisinik malittarisassanillu unioqutitsinermik kinguneqartussaasut unioqutitsinertut isigissallugit.
3. Immikkoortumi tassani sunaluunniit piginnittunut kinaassuserneqarsinnaasut pisinnaatitaaffiinik, umiarnikunik qalluineq pillugu inatsisinik imaluunniit allat imarsiornermut inatsisinik imaluunniit kulturimut tunngassuteqartunik paarlaasseqatigiinnerit eqqarsaatigalugit inatsisinik periutsinillu attuinngillat.
4. Immikkoortoq taanna nunat tamalaat itsarnitsat imaluunniit oqaluttuarisaanermut tunngassuteqartut illersorneqarnissaat pillugit isumaqatigiissutaannut attuumassuteqanngilaq.